

99er Bäsefrässer Fasnacht 2024

Dr Donnschtigs-Jass duet s Schwizer Färnsee SRF life sände

Dr Imbi dä het d Hoose voll, das chönnti piinlich ände

Walliserdütsch isch d Rettig, jo, das gseen mir au

Do chann er sage was er will, das verschtoot kei Sau

In Russu trumpfe eusi Jasser denn so richtig uf

D Aescher wärde grünen im Gsicht und muffen no als muff

Dr Coach vo Aesch het biichtet und sich e bitz schiniert

Si heige us Versehe, nur Tschau Sepp trainiert

Wenn Promis amme Gschäft e Uftrag gän, denn freut das sehr

Für gwöönlich seit dr Bsitzer, das isch mir e Ehr

Dr Salzi möcht si Velo bim Schrade warte lo

Dä seit nur, vergiss es, dä Chlapf isch nit vo do

Dr Matthis meint, är chönnt, brilliere bim grilliere

Doch dä Grill isch z chlei, är duet sich schwer blamiere

Bis de dört e Wurscht bechunnsch, jo, das merggt me gli

Isch die tolli Sändig sit Schtunde scho verby

I faar e Meter und nomol Zwei, und denn muessi halte

Faar drei Meter witter, es loont sich nit zum schalte

Es isch mr schissegliich und do bini froo

Ob ich bi 80 oder 60, vo Riinach här due sctoo

Dr Gugger Chor «Vergissmeinnicht» singt mit Charme und Pfiff

Dr Lucas Heinis dirigiert, hett d'Dame voll im Griff

Kei Schnäädere, kei umme Muule, Niemerts schwätzt ihm dri

Im Gägesatz zum Männerchor, hetts kei Schänggeli Willi drby

Open Doors uf dr Gmeini, chasch dängge, die bliibe zue
Es macht dr Aschyn, uf dr Verwaltig, wänn si ihri Rueh
Die Türe bliibe gschlosse, das hett e guete Grund
Dass dr Edi Löw uff kei Fall wider chunnt

Die langi Kirchenacht chunnt de Geischtliche grad gschliffe
Als Rabe flattere si umme, düen chrächze und düen pfiffe
Mir glaube, si hei vo Ihrem CHEF, diräggt e Tip becho
Und s Gugger Sujet «mir hän e Vogel», scho dört uf d Schippe gno

Mir tigge lätz, hei e Schuss und schpinne eifach so
Dumm wie Brot und nid ganz dicht, würdi knapp no go
Tasse fääle au im Schrangg, und biireweich oje
Das sind eusi Sujet Vorschleg, ans Gugger Comité

Zwei Purzelbäum, drei Liigestütz und s'Bei nach hinde biege
Im Aurum Training, do wirsch fit, chasch gli ins Wältall fliege
Ob hindere Mond oder uf e Mars, chaschs dreie oder drülle
D'Hauptsach isch, das Ruumschiff duesch, mit luter Gugger fülle

die Löcher uf dr Bahnhofstrooss, do schüttlets di denn duure
bisch mit em Velo underwägs fliegsch ständig fascht uf d Schnuure
si wird gli gfliggt, mir flippe us, denn chasch mit dim Chaare
Im Tämporusch immerhin wider 30ig faare

Champs-Elyseés Song

Aber gli, aber gli, aber gli dir wärdet's schon no gsee

Aber gli, aber gli, gitts do e Champs-Elyseés

Bahnhofstrooss Därwil isch bald passé

Gli hei mir do e Champs Elysées

S Ruthli reagiert, die isch uf zagg

Bschtellt Gucci Brülle im Multi Pagg

Im Konsi klatsche si in d Händ

Wächsle subito ihr Sortimänt

Chanel und Dior, das duet jetzt passe

und s Buebedorf Ruth hoggt an dr Kasse

dr Begg Walti, au är nit dumm

baut express sini Schüre um

an sone Boulevard, duet är plane

muess e Fudi Schuppe aane

au s Dorothee, die rüschtet uf

will Falte mache d Fraue muff

duet d'Anti Age Crème nüt me nütze

chasch hinterem Vorhang Botox sprütze

dr Steffi Gschwind heisst künftig Maîre

statt Papi sage mir denn Père

am Schugger seit me Flic, chunnsch druss

und euse hett e Soggeschuss

au dr Shahin het e exklusive Touch becho

serviert Fröschebei und Escargot

als Surprise zieht är s Tutu über si Ranze

und duet e heisse Cancan danze